

## AGRICOLTURA

Lantsch: igl concept agricoltur ecologic è realiso

## Cura tgi pours èn er biologs



Igls pours da Lantsch sa tignan bagn ve digl concept agricoltur ecologic. (da san.) Markus Bläsi, Daniel Ulber, Otto Cadosch, Simon Willi, Gaudenz Ulber, Banadez Cadalbert e Leo Ulber. I mantgan Theo Simeon e Wendelin Jost.

● **G.N.S. Igls pours da Lantsch e da Brinzauls èn igl migler exaimpel per en bung concept agricoltur ecologic. An dus onns è chel nia elaboro e gio è igl concept da reit da colliaziun sot tetg. Dumengia passada è chel nia preschento.**

Igls davos onns on divers cumegn elaboro en concept agricoltur ecologic, differents cumegn èn vedlonder ed oters suonndan. Tar igl concept da reit da colliaziun vogl surtot da tgirar e mantgineir igls pros, da betg disfar la nateira e da porscher a fauna e flora en spazi da veiver. I vo dantant er da lascher la nateira uscheia scu chegl tgi Nussigner ò stgaffia. Anc avant pacs onns era chegl en tema tgi interessava betg schi blers. Siva tgi la confederaziun sustigna la realisaziun da chels concepts e surtot er igls pours tgi sa tignan ve da chels, è igl interess da tgirar la nateira s'augmento considerablament. I vo dantant er tgi la nateira survigna anavos ensatge dalla sia diversidad naturala.

#### Bleras sorts pang

An collaboraziun cuagl Parc Ela e l'Uniu purila Alvra, on igls pours da Lantsch anvido ad ena festa digls pros dumengia passada. Cumbinada è chella festa gist nei-

da cun en ansolver sen igl bagn puril da Banadez Cadalbert. Las pouras ed igls pours da Lantsch vevan paragea en ansolver cun angal igls miglers products da tgesa. Ins ò vasia tgi las pouras on paragea igl ansolver cun amour, sa do gronda fadeia e fatg la migra reclama per igls products agricols. Tiers tgi l'ora è sa mussada dallas sia vart negativa, èn blers giasts ed indigens suandos all'invitazun digl Parc Ela e dall'Uniu purila Alvra. Corsin Farrer, igl parsoura dall'uniu ò benevento tots ed accentuo l'impurtanza digl Parc Ela per l'agricultura. Er dalla vart digls pours dovra e maretta igl Parc Ela igl sustign basignevel.

#### A Lantsch dattigl anc nov pours

Siva digl ansolver comunabel èn tiers la plievgia tuttegna 20 persungas eidas cun Regula Ott digl Parc Ela e cuagl pour Daniel Ulber or sen igls pros. Cun l'excursiu ins leva mussar exaimpels concrets scu tgi gl'è pussebel da migliurar la qualitat da veiver per animals, plantas e flours. Durant l'excursiu ò Daniel Ulber er detg tgi a Lantsch fetschan anc nov famiglias agl pour. El ò er detg tgi igl impuls da far igl concept da reit da colliaziun a Lantsch vegia do igl anteriour selvicultour, Ueli

Vetsch. Lantsch ò ena surfatscha da taragn agricoltur da 230 hectaras. Aint igl cumegn da Lantsch dattigl betg ena migliuraziun e per relisar en bung concept agricoltur ecologic so chegl er esser d'avanatg. Detg simpel tscherts bostgoms, tga-glioms e meirs da crappa naturals èn anc existents. Per bleras sorts d'animlas è chegl da grond'impurtanza per surveiver ed er cò ins ò vasia a Lantsch fitg bungs exaimpels.

#### Radond 3'000.- fr.

Lantsch è en cumegn cun bler taragn artificzial tgi vign samno, pros grass noua tgi vign lado e patto puschigna, dantant er blers pros maiers tgi vignan betg cultivos. La gronda part da chels èn sot la baselgia veglia da Lantsch e dall'otra vart dalla vischnanca. An Svizra dattigl angal ple 1.5% pros betg cultivos ed aint igl Grischun èn chegl anc adegna 15%-20%. Igls pours dalla bassa seian er betg schi incantos tgi la confederaziun sustigna en concept agricoltur ecologic, ò detg Otto Denoth igl cunsigliedèr puril. En pour cun 25 hectaras taragn survigna radond 3'000.- fr. schi el sa tigna ve digl concept agricoltur ecologic. Detg oter ègl uscheia tgi en pour seia ena part digls pros tenor igl datum perscretg e lascha er tranter igls pros ena strefla da ca. 3 m per tgi flora e fauna vegian lour spazi da veiver.

#### Gio igls amprens resultats

Regula Ott digl Parc Ela, ò detg tgi oz ins vegia gio igls amprens resultats siva tgi la confederaziun vegia introduia igl concept agricoltur ecologic ed indemnisescha igls pours persiva. Crudo an igl seia ad ella surtot tgi detta puspe duple dus speztgas da pulas e dus utschels tg'ins vaseva betg ple schi bler an Surmeir.



A Lantsch on igls visitades er gist gia occasiu da valetar divers pros.